

LIGJ Nr. 86/2014 Date 17.7.2014

**PËR DISA NDRYSHIME NË LIGJIN NR. 9975, DATË 28.7.2008, “PËR TAKSAT KOMBËTARE”,
TË NDRYSHUAR**

Në mbështetje të neneve 78, 83, pika 1, dhe 155, të Kushtetutës, me propozimin e Këshillit të Ministrave,

**KUVENDI
I REPUBLIKËS SË SHQIPËRISË VENDOSI:**

Në ligjin nr. 9975, datë 28.7.2008, “Për taksat kombëtare”, të ndryshuar, bëhen ndryshimet dhe shtesat e mëposhtme:

Neni 1

Neni 1 ndryshohet si më poshtë:

“Neni 1

Qëllimi

Ky ligj përcakton llojet e taksave dhe tarifave kombëtare që zbatohen në Republikën e Shqipërisë, nivelin e taksave kombëtare, procedurat e llogaritjes, të arkëtimit dhe transferimit në Buxhetin e Shtetit ose në buxhetin e njësisë të qeverisjes vendore të taksave dhe tarifave kombëtare, si dhe detyrimet që kanë agjentët e taksave dhe tarifave kombëtare.”.

Neni 2

Neni 2 ndryshohet si më poshtë:

“Neni 2

Përkufizime

Në këtë ligj termat e mëposhtëm kanë këto kuptime:

1. “Taksapagues” është çdo individ, person fizik ose juridik, vendas apo i huaj, i cili është i detyruar të paguajë njërin nga taksat kombëtare, të përcaktuara në këtë ligj.
2. “Taksë” është pagesa e detyrueshme dhe e pakthyeshme në Buxhetin e Shtetit që paguhet nga çdo person apo nëpërmjet një agjenti që ushtron një të drejtë publike apo përfiton një shërbim publik në territorin e Republikës së Shqipërisë.
3. “Tarifë” është një pagesë, që një individ, person fizik apo juridik, bën drejtpërdrejt apo nëpërmjet një agjenti tek administrata tatimore qendrore. Pagesa bëhet në shkëmbim të një shërbimi specifik të marrë, të mire publike specifike të përdorur apo të drejte të dhënë.
4. “Agjent i taksave dhe tarifave” është personi i cili, sipas kërkesave të këtij ligji, është përgjegjës për llogaritjen, arkëtimin dhe transferimin në llogaritë e drejtorive rajonale tatimore, për t’u transferuar, më pas, në Buxhetin e Shtetit, të të ardhurave nga taksat dhe tarifatat kombëtare.”.

Neni 3

Në nenin 3, pas pikës 8 shtohet pika 9 me këtë përmbajtje:

“9. Taksa mbi të drejtën e përdorimit të truallit shtetëror në përdorim.”.

Neni 4

Në nenin 4, pas pikës 8 shtohet pika 9 me këtë përmbajtje:

“9. Niveli i taksës mbi të drejtën e përdorimit të truallit shtetëror në përdorim, aplikimi, llogaritja dhe pagesa e saj bëhen sipas përcaktimeve të ligjit nr. 10 270, datë 22.4.2010, “Për të drejtën e privatizimit të truallit shtetëror në përdorim dhe për taksën mbi të drejtën e përdorimit të tij”, të ndryshuar.”.

Neni 5

Neni 4/1 ndryshohet si më poshtë:

“Neni 4/1

Deklarata për pagesën e taksave kombëtare

1. Personat fizikë dhe juridikë, subjekte të nenit 4, pikat 1, 2, 3, 4, 5, 6, 7 dhe 8, të këtij ligji, si dhe agentët e taksave, në rastin kur taksat mblihen me agentë, detyrohen:

a) të bëjnë një deklaratë për çdo muaj, jo më vonë se 15 ditë pas përfundimit të muajit për të cilin bëhet deklarimi;

b) të paguajnë taksat kombëtare për atë muaj në datën ose para datës së detyrueshme të deklaratës.

2.Deklarata, sipas shkronjës “a”, të pikës 1, të këtij neni, bëhet në formën dhe përmbajtjen që përcaktohet me udhëzim të Ministrit të Financave.

3.Deklarata për pagesën e taksave kombëtare dorëzohet në një nga mënyrat e parashikuara në ligjin nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar, pranë drejtorisë rajonale tatimore ku është i regjistruar personi fizik/personi juridik, subjekt i deklarimit të taksës kombëtare.”.

Neni 6

Në nenin 5, pas shkronjës “ë” shtohet shkronja “f” me këtë përmbajtje:

“f) Drejtoria e Përgjithshme e Tatimeve, nëpërmjet drejtorive të saj rajonale, ngarkohet me mbledhjen e taksës mbi të drejtën e përdorimit të truallit shtetëror .”.

Neni 7

Neni 6 ndryshohet si më poshtë:

“Neni 6

Transferimi i të ardhurave nga taksat dhe tarifat kombëtare në drejtorinë rajonale tatimore dhe në llogaritë e njësive të qeverisjes vendore

Agentët e taksave deklarojnë dhe transferojnë të ardhurat nga taksat dhe tarifat për llogari të drejtorisë rajonale tatimore, në përputhje me nenet 4, 4/1 dhe 11/2, të këtij ligji. Për detyrimet e patransferuara të taksave dhe tarifave, për agentët zbatohen sanksione në përputhje me nenin 117, të ligjit nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar.”.

Neni 8

Në nenin 8, pas shkronjës “e” shtohet shkronja “ë” me këtë përmbajtje:

“ë) për taksën mbi të drejtën e përdorimit të truallit shtetëror 0 (zero) për qind.”.

Neni 9

Në nenin 9, pas pikës 3 shtohet pika 4 me këtë përmbajtje:

“4. Taksa mbi të drejtën e përdorimit të truallit shtetëror nuk zbatohet mbi trojet turistike, mbi objektet dhe trojet e pranuar në proces legalizimi apo mbi trojet shtetërore, të dhëna me qëllim investimin mbi to, të cilat rregullohen nga ligje të tjera.

Përfshihen nga pagesa e vlerës së qirasë së truallit në përdorim, nga momenti i privatizimit, blerjes apo ndërtimit të objekteve deri në datën 7.6.2010, të gjitha subjektet apo individët që janë objekt i ligjit nr. 10 270, datë 22.4.2010, “Për të drejtën e privatizimit të truallit shtetëror në përdorim dhe për taksën e përdorimit të tij”, të ndryshuar, të cilët bëjnë kërkesë për privatizimin e këtij trualli dhe paguajnë në mënyrë të menjëhershme vlerën e plotë të tij.”.

Neni 10

Pas nenit 11/1 shtohet neni 11/2 me këtë përmbajtje:

“Neni 11/2

Deklarata për pagesën e tarifave kombëtare

1. Personat fizikë dhe juridikë, subjekte të pagesës së tarifave kombëtare, në përputhje me nenin 11, të këtij ligji, si dhe agjentët e tarifave kombëtare, në rastin kur tarifat mbledhen me agjentë, detyrohen:

a) të bëjnë një deklaratë për çdo muaj, jo më vonë se 15 ditë pas përfundimit të muajit për të cilin bëhen deklaratimet;

b) të paguajnë tarifën kombëtare për atë muaj në datën ose para datës së detyrueshme të deklaratës.

2. Deklarata, sipas shkronjës “a”, të pikës 1, të këtij

neni, bëhet në formën dhe përmbajtjen që përcaktohet me udhëzim të Ministrit të Financave.

3. Deklarata për pagesën e tarifës kombëtare dorëzohet në një nga mënyrat e parashikuara në ligjin nr. 9920, datë 19.5.2008, “Për procedurat tatimore në Republikën e Shqipërisë”, të ndryshuar, pranë drejtorisë rajonale tatimore ku është i regjistruar personi fizik/personi juridik, subjekt i deklarimit të tarifës kombëtare.”.

Neni 11

Dispozitë kalimtare

Ngarkohet Ministri i Financave të nxjerrë aktet nënligjore në zbatim të këtij ligji.

Neni 12

Ky ligj hyn në fuqi 15 ditë pas botimit në Fletoren Zyrtare.

Miratuar në datën 17.7.2014

Shpallur me dekretin nr. 8667, datë 1.8.2014 të Presidentit të Republikës së Shqipërisë, Bujar Nishani

Botuar ne F.Zyrtare 126 / 2014

Dale nga shtypi me 11.08.2014